

Cecilia Berther - Deflorin, Rueras

* 20-09-1931 † 08-07-2002



Nossa mumma ei luvrusa
ha ruaus schi scart.
Da cazzola la sepusa,
sur la meis'e cuntsch'e cusa
aunc la sera tard.

Quels plaidis severificheschan ed ein adattai per mintga
mumma, aschia era per Celia sco ella vegneva numna-
da da nus tuts.

La Cecilia ei naschida a Zarcuns ils 20-09-1931 sco feglia da Baseli Deflorin e Mariuschla Riedi. Ses geniturs fagevan il pur. El ravugl d'aunc treis soras e treis frars ha Celia astgau guder ina biala affonza en gl'ambient d'ina buna famiglia purila. Havend frequentau las scolas da vischnauca, era il bia la sort prender sac e pac e serender ella Bassa a fadigar per sustener ils da casa. Quei destin ha era tuccau la Celia. En differents logs ha ella luvrau per cumpleina cuntentientscha.

Gl'onn 1960 sospusa ella cul giuven Sep Fidel Berther da Rueras ch'era meina fatschenta dalla scrinaria Frars Berther. La lètg vegn benedida da tschun affons. Gronda legria, mo l'umbriva s'avischina memia spert. Treis affonetts pren il Segner en cuorta vegliadetgna. Ins sa comprender con vess gl'ei iu da capir la veglia dil Segner. Mo cun gronda cardientscha ha la Celia e siu mariu pudiu supportar quella greva crusch. Persuenter han els schau muncar nuot al fegl Pancrazi e feglia Judith.

La veta varga e va. Havend dau als affons buna educaziun han quels fundau atgnas famiglias. La truscha en casa vegn levgiada e Celia ha dapli temps per siu iert. Leu era ella savens da cauld e freid. Ina paterlada cul vischin ni vischina dretg ni seniester dalla seiv deva ella bugen. Pervia da quei stuevan sias poppas fluras nuota pitir. Las flurs haveva ella propri bugen.

1994 miera siu car mariu suenter ina malsogna da plirs onns. Ussa era ei vit en casa, Cecilia lai nuota stermentar. Era sco vieua stoi ir vinavon. Beadis e beadias, fegl e feglia fan cuort'uriala alla cara mumma e tatta. Mintgaton in sprun tier la Lisabeth ed il Sep, spassegiadas e cusseidas cun amitgas levgeschan il destin. Ina frida malguessa ei segir stau la mort dalla cara beadia Fabienne entras in accident a s. Brida. Tutttenina che negin havess sminau sto la Celia muort ina attacca d'ina maligna

malsoma serender el spital. Neginna speronza da serestabilir, astga Cecilia aunc passentar in pign temps egl Asil s. Vigeli. Ils 08-07-2002 cloma gl'aunghel dalla mort la buna mumma ellas sferas perpetnas.

Cara Cecilia

Cun bia legria, mo era cun bia umbriva e tristezia ei Tiu viadi terrester ius alla fin. Tes cars, parents e vischins laian encrescher per Tei. Ti has fatg lartg odem il vitg. Nus tuts tenin Tei en buna memoria. Cun in Dieus paghi da nus tuts, retscheiva ussa la pagaglia celestiala e sin seveser el liug da nies Scaffider.

Ruaussa en paisch

Pallys Vinzens